

527



6

21-g

7



Bibliotheca  
i Coll. Rom.  
Societ. Jesu

21-c-25


6-2197



ANGELI CVSTODIS  
A D  
HVGNEM GROTIVM  
SVPER  
NVPERO EIVS CARCERE  
PARÆNETICON

exceptum & publicatum

à IOANNE HEMELARIO Hagienſi  
Canonico Cath.Eccleſ.Antuerp.



ANTVERPIAE,  
EX OFFICINA PLANTINIANA  
Apud Balthasarem Moretum, & Viduam  
Ioannis Moreti, & Io. Meursium.

M. DC. XXI.





# HVGONI GROTI

## I. C.



VM nuper ad te, HVG  
GROTI (quando miro quo-  
dam commento ceu strata-  
gemate, ipse paullo antè cu-  
stodia damnas, per excubias  
& custodias inimicas, in cu-  
stodiâ viatoriâ, ab ipsis custodiis tuis, sed igna-  
ris, ex hostili custodiâ & pœnali carcere elatus  
feliciter euasisti, & iam liber Antuerpiam hanc  
nostram applicuisti) visendi & congratulandi  
causâ accessissem, & pro re natâ, & sermonis,  
vt fit, vario cursu, tu Scazontes tuos versus in  
solatium tibi caussaq; & carceris socio Hoger-  
betio scriptos recitasses, eorumq; etiam copiam  
fecisses; incescit me mox lubentia super hoc car-  
ceris tui atque felicitis ex eo effugij argumentò,  
simili carminis genere aliquid ludendi, quod ele-  
gantissimis tuis versibus si non lepore, saltem  
materiâ responderet. Verùm cùm in id inten-  
denti cogitationem mihi, & iam stylum in ma-  
nus sumentis inuentiuuncula crescerent ac se dif-

A 2

unde-



4  
funderent; & Scazontis illa claudicatio concinna, lasso facile penultima sedis desultorio illo Iambi pede, difficulter admodum mihi procederet, & in plusculos se passus seu saltus producere recusaret; verti modos, & assueti magis; ut sic dicam, tripudij Iambos, ut minus fatigandos in scenam produxi. Hi cursum, ut videbis, longiusculum producere ausi sunt, vnius quem pro totâ orchestrâ & caueâ sibi spectatorem auditoremq; destinârunt, seu paucorum certè aliorum oculis & auribus, ut se probarent animati: tum & beneuolentia stimulis excitati, qua tibiae suae velut modos, ad numeros opportunè & largiter adhibebat. Qui quidem seu auditor seu spectator vel vnus, vel saltem primus, cum tute esses; non potui non hunc Lusum arbitrij & iuris tui facere. Habebis igitur hunc super  
VARIO CARCERVM GENERE conceptum, non ingenij aut doctrina, qua mihi non arrogo, sed voluntatis in rem & salutem tuam saltem nostrae propensioris factum; eoq; manifestioris, quò diffusior hic sermo est. Amor enim, ut nosti, si minus esse disertus possit, multiloquio tamen gaudet. Quem etiam vel ex hoc probare possis, quia eo maximè tempore alloquium hoc produxit, quando nostri Instituti homines, qui  
Eccle-



Ecclesiae functionibus adscripti sumus, plures  
& statae occupationes seriaq; differre & deti-  
nere ferè totos solent: Hebdomada quippe illius  
ferijs minimè feriatis, quam, ob maxima in nos  
Christianos illo anni tempore collata calitùs  
beneficia & charismata, MAIOREM, siue BO-  
NAM, siue SANCTAM priscâ nuncupatione  
indigitamus. Sed & cura atque amoris in te  
Angeli Custodis tui peculiariter hîc tesseram  
agnosces, quo & ipsum accensum, meo Custodi  
hac vt describenda mihi suggereret (instanta-  
neo illo scilicet Angelici sermonis modo, quo al-  
ter alteri suae mentis conceptus pandere solet)  
auctorem fuisse vix dubitandum putem. Neque  
enim ego (qui ad quattuor vestros, viginti plus  
minus versus pangere paraueram, in eo scri-  
ptionis & metri genere vix versatus, & si ali-  
quando fuisset, arefactâ iam pridem per deffue-  
tudinem venâ, eorumq; argumentum & velut  
ὁμογενείαν iam cum Casperio Geuartio, qui  
mecum ad te viserat, candidissimo & elegan-  
tissimo illo amico communicaueram) tam sat  
multos, humilem licet rusticumq; & simpli-  
cem, ac minimè cothurnatum sermonem, ad  
modulum & morem nempe ac tenuitatem cen-  
sus hîc & alibi mei, crescente sub ipso stylo &

6  
manu materiâ , & non gravatè in ordines & numeros suos se aptante , effudissem , nisi omnis Phæbi aut Euterpes loco , Angeli boni suggestio materiẽ & verba scribenti ferè ex tempore suppeditasset. Leges itaque , sed (quod paciscor , & serid atque amicè peto ) qualis caussas pro tribunali definiturus soles , seposito inolite tantisper consuetudinis , quam Batavia patria nunc habet , & institutionis à puero tibi infusa affectu , vtramq; scilicet aurem vacuum & non præoccupatam adferens agnoscendæ veritati. Tum & hocce , rogem , schemate tibi proposito hac legere non detrectabis , atque si totidem verbis Angelum tuum diuinâ sed visibili tibi specie iuxta adstantem , amantissimum velut pedagogum , caligantis (quod in re Fidei arduâ , & supra humanum captum ascendente necesse est) iudicij & intellectus moderatorem , compellantem & instantem tibi coràm oculis cernere , auribus blando illo celestis oris sono illabentem audire contingeret. Quæ quidem Angelica visitationis familiaritas vt multis è Sanctorum numero contigit , ita peculiariter & frequenter nobili virgini & martyri Cæciliæ , itemq; sanctæ Franciscæ viduæ , Romanis , & nostræ , passionibus Christi Domini per triginta tres annos  
confor-

conformatissima virgini & populari S. Lyd-  
 vvidi Sciedamenſi; quas & mentis puritas, &  
 mundi ſolidus contemptus, & flagrans amor  
 Dei hacce Angelica viſionis familiaritate olim  
 & nuper dignas fecit. Atque vtinam ea viſ An-  
 gelica huius Paraneſios ſit, vt ( quodeſt Ora-  
 tore tanto dignum ) non appoſitè tantum, ſed  
 efficaciter etiam ad perſuadendum & dixiſſe,  
 & auſcultatus eſſe poſſit. Faxit Deus; teq; re-  
 ducem Eccleſia ſua, & in eâ nobis clementer  
 ſiſtat, Dominus ille Redemptor tuus & meus;  
 qui & ex omnibus carcerum periculis ani-  
 mam tuam liberaſſe videtur, vt tute iuris iam  
 tandem tui factus, & voluntatem ſub eius lege,  
 ſponſaq; eius Eccleſia, & intellectum ſub Re-  
 gulâ tradita & propagata calo Orthodoxæ  
 Catholica Fidei, & memoriam ſub accepto-  
 rum agnitione & gratiâ beneficiorum, cum grâ-  
 titudinis præſcripto debitoq; iugo, non grauâtè  
 aut valdè reſtitans; ideoq; affluentiore merito,  
 vt tua iam ſpontis exiſtens, liberè captiuares:  
 quiq; idem Dominus ac Saluator noſter ho-  
 dierno magno illo ac ſolemni præ ceteris die, &  
 hac eâdem quâ hac maximè ſcribebamus horâ  
 ( ſub auroram Paſchalis nempe diei ) confracto  
 inferni carcere, captiuâq; ductâ captiuitate,

triumpho nobili victor ad superos gloriose est  
 reuectus. Sic per illa vt paullo antè humiliati  
 & indignissima passi, ita hac horâ clarificati &  
 supra modum exaltati Domini gloriosa merita  
 ex animo vouebam, spei bona plenus, & ferè  
 securus de euentu : quando & eodem hoc  
 magno publici Christianorum triumpho atque  
 gaudiij die te materni carcer vteri in liberam  
 hanc lucem (quod recens intellexi) feliciter pro-  
 duxerit : vt tam laureatâ nimirum festaq; so-  
 lemnitate (cui nec Alexandri Macedonis nata-  
 lis geminâ Philippi parentis victoriâ illustris  
 componi vel per vmbram potest) mundi huius  
 stadium ingressus, nec tu de indulgentissimi  
 agonothea palinis seu brauiio desperares, neque  
 nos, qui prolixam in ceteris diuina bonitatis er-  
 ga te liberalitatem admiramur, in eo quodd  
 VNVM est NECESSARIUM, aut tuam volun-  
 tatem desiderandam, aut Dei manum abbre-  
 uiandam metueremus. Cùm enim solemnè in-  
 augurandi Principis ingressu, publicaq; latitia  
 die, exulum omnium, quocumq; currum eius  
 affectantur, vita, libertas, iusq; patriæ ac fami-  
 liæ in integrum restitui soleant; quis non confi-  
 dat, hunc tam singularis latitiæ atque indul-  
 gentissimæ beneficentiæ celestis Regis comi-  
 tem,

9

tem, ad triumphantis ingressum se sistentem,  
imò ab ipso eodem productum, triumphalis  
participatione priuilegij priuatum iri vix pos-  
se? Verùm quia reuocanda Donationis iura in  
vnâ, vt maximè, ingratitudinis culpâ fundari  
Iurisconsulti vestri tradunt; hanc tute vt eua-  
das, in tuâ nunc industriâ & manu, occasio-  
nisq; oblata non supino amplexu, adspirante  
qua nunc tibi se offert diuinâ gratiâ, situm scias.  
Hanc autem Occasionis bonæ HORAM tuam,  
ne RVAT tibi, aut ruisse eam post serus gemas,  
bonam tibi imprimis Mentem, & ad Angeli-  
cam Commonitionem aures contriti & humi-  
liati cordis à Deo propitio concedi totus precor.  
Quo in voto finem facio, non euanidi affectus  
erga te & salutem tuam mei, lucubratiuncula  
huius quali quali curâ, etsi minùs ad meam vo-  
luntatem & aciem tuam accuratâ, fidem tibi  
factam volens, & factum iri confidens,

IO. HEMELARIVS.

A 5

IV-

IVSTI RYCQVII GANDENSIS

Presbyteri, Ciuis Romani,

I N

IOANNIS HEMELARII

PARÆNETICON

HVGONI GROTIO

super carcere eius scriptum.

**C**USTODES hominum Genij, quos diā potestas

Mortali generi vt fidos coniunxit Achates,

Immerito aduersis squalentia pectora rebus

Non semel eripuerunt, suo dignosque fauore

Eripient. Horum socio molimine, GROTI,

Te Batauas exisse manus, cæcæque sub arcâ

Credimus infestis saluum erupisse latebris.

Magnum opus, ingenioque tuo & conamine  
dignum.

Tu tamen vt meritas Superis persolvere grates,

Et Superum Regi possis, HEMELARIA scripta

Pérlege, quæ sancti Genius dictauit amoris.

Nec tantum lege, sed memori complectere sensu.

Sors tua sic verâ te libertate beabit,

Sic solidum felix tua nos fortuna iuuabit.

*Psal-*

*Pſalm. XCIV.*

Hodie ſi vocem Domini audieritis , nolite obdurare corda veſtra.

*Pſalm. XC. XI.*

Angelis ſuis Deus mandavit de te , vt cuſtodiant te in omnibus viſtuis.

I A G

S C A-

## SCAZONTES GROTIANI

ad quos hoc scriptum alludit,

A D

RVMOLDVM HOGERBETIVM,

pari custodiæ addictum;

in solatium scripti, sic se habebant:

**Q**UOS *matris alius carcer edit in lucem,  
 Quæ corpus animum more carceris  
 vincit,*

*Quos morte functos terra carcer expectat,  
 Numquam nimis timere carcerem debent.*

H. GROTIUS.

AN-



ANGELI CVSTODIS  
A D  
HVGNEM GROTIUM  
S V P E R  
NVPERO EIVS CARCERE  
PARÆNETICON.

*Angelus loquitur.*



ARRARE fata carcerum, est mens,  
GROTIO,  
Qui nunc solutus libero exultat  
pede;

Vt, me docente, certius liber fiet.

Sed antè nexus quàm pererro dædalos,  
Qui siue mentem siue corpus impetunt,  
Stringuntque vinclo, tetrico, blando, malo,  
Laxo, fugaci, subdolo, insolubili;  
Compello, CHRISTE, te Magistrum, te inuoco,  
Qui (Verbum ut ipse Patris æternum optimi)  
Quæ nota visu, quæque sensu imperuia  
Potente VERBO condidisti TE, & tuo:  
Qui nos beati gaudiij certos, loco  
Firmasti, & hosce creditos nostræ fidei,  
Ad promerendam comparis sortem boni,  
Momenta ad æui paucula hæc, queis viuitur,

A 7

Tua

Tuæ dedisti Gratiaë innixos trabi  
Periculoso voluier vitæ salo:  
Imploro te, qui vita, virtus cordium,  
Patri coæva æternaque Sapientia,  
Digitus Dei es, via recta, prima veritas:  
Me, quem dedisti Hugonis huius arbitrum,  
Fidumque Achatem, interpretem iussi tui,  
Referare vera da, sequi da Grotium.

O dedicatum Palladi ac Musis caput,  
GROTI, sacrandum aut pulchrius vero DEO;  
Ego dux, comesque, tutor & vitæ tuæ,  
Deo fauente, certus adiunctus tibi:  
Qui te parentis carcere effusum extuli,  
Originalis labe tersâ & carceris,  
Qui vitæ ad ipsos carceres calcar fui:  
Inscitiæque carcere agnato erutum,  
Custode caplæ & pædagogo liberum,  
Orbillijque carcere, & ferulæ minis:  
Tum carceri mox Curiaë blando inditum,  
Custodiarum & post gementum Præsidentem  
Qui te hoc tumultu & carceratis abstuli:  
Dein (Rotta, iacto ubi carceris repagulo,  
Per quæque sponte vincula imposuit sibi  
Arcet furentis iram amaram vorticis)  
Neptuniæ qui prolis ex ergastulo  
(Assessor vno quippe haud nexus vinculo,  
Vrbis, Senatus, litium, plebis, maris  
Dictare iura hinc Syndicus fidus soles,  
Ceum verna populi, Curiaë deditus,  
Rotamque Rottæ, callidique carcerem  
Referare Iuris, seu laxare & claudere)  
Vulgatiore in carcere assertor fui:

Atque

Atque hoc nec vno, nec loci fueti aut modi:  
 (Nam singulari extra ordinem carcer datus  
 Geminus, sed ille primus in custodiam  
 Reo paratus, vsque controuersiam  
 Dum terminatam redderet sententia;  
 At alter iste totus in pœnam fuit.)  
 Téque hisce vinctum condolens custodijs,  
 Sollicitâ vt illâ, ita hac recidente exitum,  
 Hostili vtrâque, miserâ & eduxi & graui.  
 Probatus ipse tot periculis tibi  
 Mandante Domino, Nuntius quod adfero,  
 Tu vt exsequaris imperat Ius, fas petit.  
 Namque vltimo in discrimine vt scias meam  
 Operam; fuit nec mentis hîc vigor tuæ,  
 Fortuna Magni, fida consortis manus,  
 Tuæ innocentis omen aut Corneliæ,  
 Gnatae ad fugam patrem cientes paruulæ,  
 Minusque casus: Numen ipsum è Machinâ,  
 Eiûsque non supina Prouidentia,  
 Me destinato, duxit & saluum extulit.

Sic administris Angelis custodibus,  
 Quæis vita præceps credita est mortalium,  
 Meminisse promptum est liberatum è carcere  
 Sodomæ nefando, & ignium horridis globis,  
 Lothum fidelem: vltoribusque fluctibus  
 Senem Noëmum cum domo atque liberis:  
 Odisque fratrum, carcere & Ioseph pium:  
 Gentem Israël seruitute Aegyptiâ:  
 Lacu leonum Daniele lurido,  
 Genio administro qui fugârat & famem:  
 Sic & Susannam criminis falsi ream,  
 Ipsamque Iudith inclytam viraginem,

Baby-

Babyloniâ & fornace tres claros viros.  
 His adde Cephæ carcerem atque vincula,  
 (Veneranda & hodie templa quæ monstrât piis)  
 Paullique Magni Barnabæque compedes;  
 Quos soluit omnes fida nostrorum manus,  
 Quæ Numen hominum credidit vitam & vias.

Metu quod ergo ego carceris liber Stygis,  
 Nec compediti Ditis expauens dolos,  
 Securus omnis carceris dubij adfero:  
 Quod turba consors carcere in carnis gemens,  
 Exosa prauæ carcerem FIDEI, rogat:  
 Quod gens amica carcere imo è pectoris,  
 Inimica comptæ ast carceri fraudis, vouet:  
 Quod corporis qui carcerem pro te ambijt,  
 Nec Virginali carcere abscondi horruit,  
 Decemque lunis istâ in arculâ stetit;  
 Tum nec recluso Virginis claustro exijt:  
 Totumque sese sub brevis specie hostiæ  
 Qui perfruendum contulit fidelibus,  
 Confertque in horas. prô, stupenda charitas!  
 Prô prædicanda Virtus, & Sapientia!  
 Subite nec lutosæ claustra pectoris  
 Chari atque amici, sed nec indigni, ô fidem!  
 Detrectat: exli dispari fato, necis  
 Cui nigra mens est, vitæ at vsque, cui nitet:  
 Quin sub sigillo & hostium vigilum manu,  
 Brevis sepulchri carceri illatus nouo,  
 Custode nec volente (cerne in hoc tuum)  
 Signôve rupto aut ostio euasit foras,  
 Idemque victor carcere ex Erebi truci,  
 (Domitis cateruis, claustra quos mortis tenent)  
 Redux, triumphans, arduo euectus polo;

Quod

Quod ille, dico, tantus Auctor intonat,  
 Interminatur, consulit, petit, iubet:  
 Quod p̄rque auorum gesta scripta posteris,  
 Non tortuosas p̄rque s̄clorum vias,  
 Quēis vera virtus, candor & Fidei stetit,  
 Per os amicū, sacra scita per Patrum,  
 Quod per piorum ter fidum stylum aut manum  
 Docui, atque menti multus occinui tuz;  
 Nunc versu in vno certus edico tibi:  
 NUPER RENATI CARCEREM ERRORIS FVGE,  
 Laxum, atque amœnum, sublitum fūco foris,  
 Adstrictum at intūs, inuium, tetrum, horridum,  
 Dirum, sacrumque, olentem, inextricabilem:  
 In sese vbi Eurū, Auster, & Boreas ruunt,  
 Fremunt, rotantur, murmurāt, strident, strepunt:  
 (Namq; Aeoli antrum huic comparatū ludus est,  
 Leuīque imago, fabula, vmbra, somnium)  
 Vbi ter recoctum tērque restinctum malum,  
 Virus cicutis Colchicis nocentius,  
 Non cordis animam, mentis ast iugulum petit,  
 Dum priuet ipsam, vita quæ sola est, Deo,  
 Eiūsque amore, quam vocamus Gratiā.  
 Propriūque sensus carcerem insuper fuge  
 Angustum, iniquum, imperuium, variabilem.  
 Quem turbat ægritudo, liuor, aut amor,  
 Dolor, cupido, gaudium, metus, fauor:  
 Quem cæcat antrum quo lateſcit veritas,  
 Et furua mentis nubila infixæ hoc luto:  
 Quem rara curuat edocentis copia,  
 Et iudicantis curta diligentia,  
 Censura fallax, temporisque caritas:  
 Strictura quem retundit acris luminis,

Caligeta

Caliget ad quod ales armiger Iouis.  
 Quis tu, quis ipse vel Plato, aut quis Socrates,  
 Interminati lucem ad altam Spiritus,  
 Dictante quo Verbū est graphon siue agraphon?  
 Quo docta Mater verba prompsit liberis,  
 Mentēque MENTIS, Verba quæ dedit, capit.  
 Quo consona Patrum pagina, æui & climatis  
 Conspirat omnis Veri in vnam Regulam,  
 Vibratā abundē at deuiantem neutiquam,  
 Vt rupe sumptam duriorē fluctibus,  
 Gnomona petræ vt angularis optimum.  
 Neque vsque differ, quod locus, tempus, modus,  
 Diuina per me & virgula hîc offert tibi.  
 Occasionis tempus vt fulgur fugit,  
 Et HORA vitæ incerta, dum loquor, RVIT.

Quod si haud seratis auribus fundo preces,  
 (Traham volentem amore, vim non inferam)  
 Nunc si vereris dicta, si surdo haud cano,  
 (Sed haud cano, aut tuā indolē noui haud probē)  
 Pergam monere, sana quæ sanatibus  
 Vt fortibus sunt, sapida quæis salus sapit,  
 Amara quamuis ceu cauendāque improbi,  
 Mali, proterui, & inquieti, & impij,  
 (Quæis fas nefasque solâ stat lubricine)  
 Hostēsque veri nare suspendant truci;  
 Vt quas colit rofas sagax, calcant fues.

Age, sponte templi carceri sacro accidens,  
 Vbi carceris condus sedet, promus poli,  
 Et clauiger vicarius, cæli ac stygis  
 Referare portas iussus atque claudere,  
 Dictare Iura & ad tribunal Gratia;  
 (Themidis tribunal horridum vt vitent pij;)

Quæ

Quæ lingua, mens, manûsque carcerum à situ,  
 Ex quo parentis es repulsus vberè,  
 Traxit per annos (carcere ut vero ex eas,  
 Timeasque nullum exinde prorsus carcerem),  
 Haud expiare temne, de ritu pio,  
 De more prisco, deque iussu Numinis:  
 Merantia sic te reddet ex veteri nouum,  
 Primæuam, ut anguis, sic senectam & exues.

Nec (qui tyrannus) carcerem MORIS cole,  
 Hunc dico, qui nunc fana Battaua obsidet.  
 Maiorum enim non iste Mos, sed est Nouus,  
 Odio parente natus è Superbiâ:  
 Rubens, recensque matris impio à sinu,  
 Erebusque portis expeditus subdole,  
 Supina petijt corda & gentem simplicem:  
 Vbi Battaua auris prisca, vix doli capax,  
 Parata falli erat, imperita ut fallere.

Vndena lustra, ne quid erres, non habet.  
 Namque antè notus Battauo haud cuiquâ fuit,  
 Cuius parentes vidit & tuus parens,  
 Nouitque cunctos, nosse seu potuit Nouos,  
 Apostatas, fugitiuulos, votifragos,  
 Contentiosos, callidos, fictos, malos,  
 Linguâ procaces, vel rudes, dicaculos,  
 Intemperantis calami, & oris improbi,  
 Merolque ventris seruulos, meros gulæ,  
 Lucrique, odique, & otij, & superbiæ:  
 Liuior bonorum quos & afflârat niger:  
 Proprioque cordis stigmate inscriptos mali,  
 Priuæque mentis sæpè compunctos notis,  
 Crebroque verbi voce damnatos sui.  
 Cuius satores miserat Sator malus,

Inimi-

Inimicus ille seminis probi ac boni,  
Agróque culto interfrens zizania,  
Lolióque perdens triticum iniecto inuidus.  
Namque antè veram constat hîc satam fidem,  
Exterminatis Gentium & lucis, Dijs,  
Fractísque fanis, arulis, cultu impio,  
Pridem antè Christum constat hîc notum probè,  
Iam præparatis mentium noualibus  
Laboriosâ ritè Sanctorum manu;  
Quos cum Christi misit in messem suam,  
Veri magister verba qui vitæ attulit,  
Industrios, gnauósque, amore feruidos,  
Probos, modestos, sobrios, castos, pios,  
Parère doctos, verbo & opere consonis.  
Qui & hosce falsos iam sibi præcognitos  
(Vt pelle ouinâ nempe coniectos lupos)  
Stygij satoris à manu, & pedissequos,  
Operas, ministros, seruulos, satellites,  
Satorem & ipsum hac inuidi atque hostis notâ,  
Tot antè sæclis iam suis, ne fallerent,  
Nec veri in vmbra luderent cautos minùs,  
Denuntiatis, cum futura panderet,  
Veracibus descripsit in parœmijs,  
Gauere iussit, hóique caulis pellere,  
Quos nulla stabuli recta cepit ianua,  
Odere quos & Tigris & fuluus Lacon  
Tutela pecori & fida vis pastoribus,  
Mactare natos, & vorare, & perdere,  
Et dissipare quod stetit tanti Deo:  
Quos hypocritas & ipsa clamat Veritas,  
Specièque comptâ subdolè introrsum putres.  
Mos iste prauâ creuit assuetudinè,

Custode,



Custode dum cessante cura intercidit:  
 Vt senticetum, caprificus, aut filix  
 Innata campis dormiente villico,  
 Vigilante sed mox eruenda stirpitus  
 Ligone siue, siue mális ignibus.

Namque hic dolosâ pectora ingressus viâ,  
 Innata ceu natura sedit paruulis:  
 Infusa qualis fœx recenti testulæ  
 Mordente aceto diluenda vel sale,  
 Scopisve defricanda, seu nitro graui,  
 Sophiæ quod almæ prouidum promat penu.

Sed carcer alter MORIS est pariter NOVI:  
 Aperitur iste in compitis, domibus, foris.  
 Fuge & hunc. Amœno vinculo insurgit potens,  
 Puluillus ille blandus, ah! carni nimis;  
 Dum nulla vincla, vt liberos, patitur pati,  
 Morésque laxat, stringit incautos magis,  
 Proprio ipse quemuis viuere arbitrio docens,  
 Sentire & omne quidquid in mentem cadit,  
 Proferre & omne quidquid in buccam venit,  
 Licentiosam dum vaser legem occinit:  
 Viue vt placebit, quod lubet liceat tibi:  
 Priui cœcubri, & contumacis imperi  
 Captos catenis raptat in præceps agens.  
 Quin nulla legum scita sacrarum ferens,  
 Nec verba MATRIS, iussa nec curans Patris  
 Dum facta dextræ liberæ, & linguæ modum,  
 Lasciuientem mentis & propriæ impetum  
 Per iusta legum frena substringi insolens  
 Queritur, negátque dirigi sceptro, aut pedo;  
 Sentire quiduis contumax, facere & loqui,  
 Cæcus furor. Carcerem haud sentit sui,

Quam-



Quámque insolenti mox graue immineat iugū.

Sic cæco amorì qui semel dedit manus  
 (Roseis corollis, atque fertis floridis,  
 Quæ grata amicæ dextra struxit subdola,  
 Colla & lacertos vinctus & fragrans caput)  
 Libidinísque seruus infamis malæ,  
 Cupidinísque ludus, & dominæ trochus  
 Rotatur, errat, voluitur, fremit, gemit;  
 Ingenua dum se facta parrantem putat,  
 Dum liberum se iactat & iuris sui,  
 Nullam reseruat vnciam mentis bonæ,  
 Nullam relinquit vnciam iuris sibi.

Sic contumacis ingenî effrenis puer,  
 Patruì aut parentis liber effracto iugo,  
 Nugatur excors, ludit, exsultat, ruit:  
 Nec lege recti, nec pudore, nec metu  
 Manus pedésve dirigi, aut vocis modos  
 Monitu regentis ritè frenari ferens,  
 Cerebri lupatis fertur in gyrum sui,  
 Donec lubido perditum in præceps agat.

At MORE PRISCO, liberos inter Dei  
 Adscriptus atque assertus, & iuris tenax,  
 Sub lege Christi viuere ingenui putat:  
 Hanc tesseram vnam libero dignam ferens,  
 Iugo suaui si illius collum induat,  
 (Illustriore vt circulo auri tortilis)  
 Si se ad parentum, liberum extollens caput,  
 Noxâ & solutus, temperet parens modos.  
 Namque est Parenti, templâ qui cæli incolit,  
 Vicarius suffectus in terris Pater,  
 Parère cui iubemur ipsius vicem:  
 Est sancta Mater, sponsa quæ summi Patris,  
 Eccle-

Ecclesiæque nomen antiquum gerit:  
 Audire & hanc mandauit æternus Parens.  
 Obtemperare nec bonis gnatis graue est:  
 Ut sponte iusti carceri obsequij inditi  
 A prorsus omni vinculo exsortes agant,  
 Et liberorum iura conferuent magis:  
 Christo asserenti dum per omne crediti,  
 Nec iam timentes aucupis stygij dolos,  
 Immunitatis lauream in tuto locant.

Sic ROMA PRISCIS MORIBVS semper stetit,  
 Famamque ad astra, sceptrâ per terras tulit,  
 Ritu vetusto, legibus, scitis, viris:  
 Totumque, quantus orbis est, vidit suum.  
 Seruauit eadem & culmen hoc sceptri sui,  
 Quamdiu ille priscus in statu fuit rigor.  
 Iamque ista Roma moris antiqui tenax,  
 Legem fidemque proferens Euangelij,  
 Apostolorum & dogmati insistens sacro,  
 Petrique petrâ fulta, & hoc filum sequens,  
 Nec latum ad vnguem flectere à prisco volens,  
 Terras per omnes Imperij sceptrum sacri  
 Diffundit, alta & iura quæ accepit polo.  
 Nam MOS VETVSTVS aureus, constans, sacer,  
 Et idem & vnus à suis crepundiis,  
 Senij omnis expers floret, & stat perpetim,  
 Securus æui & fluctuantum temporum,  
 Cælóque consors vnde originem & trahit.  
 Delubra quod, clamantque muta marmora  
 Cristata crucibus, deputata altaribus,  
 Sacrata precibus ritibusque mysticis,  
 Probata & aulæ cælicæ suffragijs,  
 Quæ primo ab æuo & hunc vigent vsque in diem.  
 Hunc

Hunc Willibrordi nobilis signis manus,  
 (Quem Roma misit & sacrauit Præfulem,  
 Gentem vt ferocem barbarâmq; moribus,  
 Fanis Deorum inaniûmq; dirutis  
 Iam mitigandam, redditam Christi sacris  
 Ad læta cæli destinaret pascua)  
 Eiûsq; Suada spiritu & linguâ potens,  
 Illuminato cæcitatæ carcere,  
 Ac veritatæ ritè sublatâ face  
 Panxit, tulitque huc viuudum, superstitem:  
 Iuuenta cuius (instar eius alitis,  
 Qui rex volantum est & minister fulminis)  
 Serena, læta, pulchriôrque tempore,  
 Qualisve Phœnix surgit à thalamo rogi.  
 Hunc, dico, morem, me signante & auspice,  
 Iam nunc require, & irretortus excole:  
 Non alia, cælum scandere vt queas, via est.  
 Sed nec morare, neu remitte in crastinum.  
 Audis vocantem? ne, caue, aure saxæâ,  
 Atlanticisq; surdiore cautibus  
 Sacrum repellas murmur instantis Dei,  
 Mei monentis, vellicantis te & tui.  
 Sic te beabit certa, & imo è pectore  
 Gustata nondum gaudiij serenitas,  
 De puriore mentis exsultans statu,  
 De dulciore gratiæ fluens sinu.  
 Quin promptè obaudi, vt contumax non audias.  
 Ne post ego idem (nunc amicus, angelus,  
 Custos, magister, scipio, calcar, pedum,  
 Rector, minister, arbiter, tutor, parens,  
 Lucerna, asylum, regula, anchora & sacra)  
 Spretus, repulsus, iustam ad iram concitus,

Cogar

Cogar diem ad locumque decretorium  
 Deferre causam, teque contra dicere;  
 Et obstinatae mentis inscriptum notis  
 Occasionis arguam spretæ reum:  
 Iudex ubi, actor, testis idem & præsidet:  
 Cuius tribunal summum, ineluctabile;  
 De réque summâ, & extimendum ut maximè est.  
 Parere disce, nemo cui paret nimis;  
 Timere disce, nemo quod timet satis;  
 Amare disce, nemo quod prensat satis:  
 Precariæ ut post carceris vitæ exitu,  
 Periculoso carcere à mundi integrum,  
 Dein restitutum carcere è terræ nouum  
 Non ullus ultra carcerum metus preinat:  
 Sed carcerem obturandum aheni imperuiio  
 Spectes beatâ celsus è speculâ poli  
 Securus, & iam gaudij certus tui,  
 Perennitèrque MAXIMUM Magnus canas:  
 Aurèsque cantu (qui Ordinis nostri) expleas,  
 Meique consors calico adstans throno,  
 Intelligas quæ dignitas sit Angelis,  
 Et quàm sit infinita maiestas Deo,  
 Eo & fruisce quàm sit immensum bonum.  
 Sic me beare gaudio gratus nouo,  
 Cæli & serenos incolas memores tui:  
 Sic te beare pace quâ gaudent pij,  
 (Quam turbida isthic massa carnis non capit)  
 Concarcerati pectora & gregis potes,  
 Quem charitatis nexus adstringet tibi.  
 Sed altiora hæc ut Fide amplecti queas,  
 Quæ firmat Orthodoxa Doctorum Patrum  
 Schola, Martyrum constantia, & promiscuus

B

Conseca-

Consensus æui atque orbis vsque in hanc diem,  
(Vnde & τὸ κατ' ὅλν nomen eductum liquet)

Ceu carceri submitte colla Ecclesiæ:

Vbi deuiante errore sensus libera

Mens, atque fulta firmâ & infractâ fide

Assentiâtur hisce quæ fert Veritas,

Illa illa prima, fallere vt quæ nec cupit,

Falli nec ipsa sic potest seu ludier.

Quæ tradit explanata Sanctorum via,

Paradoxa quamuis, quid mirum? atq; imperuia,

Stupendâque ipsis sensibus parent tuis.

Mercede namque digna non foret Fides,

Ni Veritatis deuiare nesciæ

Daret catenis mentis obtusæ manus,

Caligo quam non vna transuersam rapit,

A lacte quam non vnus obcæcat stupor.

Sed Matris hæc sunt vincla grata liberis.

Verum est & alter carcer (hunc vobis licet

Visum haud, benigni cura construxit Patris)

Clarus, serenus, instar & cæli tenens.

Quamquam iste carcer nunc quidem haud pa-  
tet viro,

Quem ritè clausus coniugî carcer ligat,

Quamdiu ipsa consors sortis & thalami negat,

Similisque nexu carceris claudi abnuens

Inuita solui comparis iugo haud potest,

Nec mortis vsque carceri impingens pedem

Hunc pristino auctum iure claustro liberat,

Adamantinum quod vsque ad exitus diem

Carcer sepulchri soluere est solus potis.

Ad magna natis, vnde cognomen tibi,

Dicata claustra hæc prouidus faber Deus,

Sele-

Selectiori struxit ut gregi suo:  
 His, qui fugacem hunc pulverem pede obterunt  
 Fastidiosi, serviant soli ut Deo,  
 Auctori & (omne quo stat & solum & salum)  
 Vinculum ut dicatos semper alliget novum:  
 Vbi velle eorum nusquam dissentiens  
 Tenace amoris compede obstringat sui.

Amor iste licitis nuntium mittit bonis,  
 Seseque Christo donat, & reddit Deo:  
 Dum vota sacra libero ore nuncupans,  
 Dicantque corde, iure se sui abdicat,  
 Totumque; quantus ipse est, quantum & possidet,  
 Cor, corpus, & quæ sortis appellant bona,  
 (Tribus hisce constant, iure quæ prius tenet)  
 Verace voto, sponsione liberâ,  
 Cogente nullo destinat volens Patri:  
 Et ante liber, iuris & spontis suæ,  
 Nunc servus ultro parat, & corpus domat,  
 Cæcos coercens impetus libidinum,  
 Nihilque prius ducit aut servat suum:  
 Sui profusus, gratus ut sit Numini,  
 Celsaque charitate sponte prodigus.  
 Pro censu & omni gratiam putans Dei,  
 Cælo petendam speque cognitam & fide:  
 Citimque quidquid est orbis fastidians,  
 Mundana cuncta spernit, ut pondus graavis,  
 Ut erigenda colla deprimens onus:  
 Ad astra cæli se rotat suspiriis:  
 Sensu atque linguâ sæpè sursum promicat:  
 Tum corda & ora, & impetum mentis bonæ  
 Eò remittit unde originem trahit.  
 Precario inquilinus, & siue hospitis,

Seu more viuens transeuntis exulis,  
 Patriam ad beatam, quæ suprà est, se comparat.  
 Atque hisce amorem Numinis dictis ciet:  
 Quodcumque dico, vile paruulum & licet,  
 Tuum id, Creator, primitus totum fuit.  
 Donasti enim hisce sponte seruulum omnibus,  
 Et immerentem: meque plasmasti tuum,  
 Quem iam redono cum penu & peculio.  
 Habeto gratum, si quid hic mei fiet.  
 Quod si iste census Angeli ad modum foret,  
 Quàm sponte totum sisterem & libens tibi!

Atque hocce grato subditæ mentis sono,  
 Laxata dextra perbenigni Numinis,  
 Quem sic notauit prodigum rei, & fui,  
 Angustioris mittit in sortem boni;  
 Celsisq; cæli destinat regnis volens.  
 Atque hinc Deo ipse grator, condit polo  
 (Quò nulla penetrat vis latronis aut dolus,  
 Tineæque morsus, vel rubigo æruginis)  
 Gazas beatas gaudij superstitis,  
 Pios manentis centuplo cum fœnore,  
 Quod nulla seculi dissipet fluens dies,  
 Quo post fruatur hacce perfunctus viâ.

Sic si illa vestra, amor tuus, Cornelia  
 Simplex, tenella, oris probi virguncula  
 Se sponte nunc ad exulis sistens genu,  
 Micante ocello, voce, gestu, blandulis,  
 Dextræque dextram, & osculo inuolans genas,  
 Roseisq; spirans cinnamum labellulis  
 Parentis ora mulceat carum & caput:  
 Hederaceisq; vinculo affectus tenax,  
 Pandens lacertos illices cordis sui,

Prædul-



Prædulce pondus pendeat collo tuo:  
 Dein mente amorem ventilans linguâ exprimēs  
 In hæcce verba soluat os pulchrum tibi:  
 Dilecte genitor, luctui ponens modum,  
 Frontem serenam nube pulsâ exporriges:  
 Animo otioso pelle, mi, curas, parens:  
 Adsum ipsa prompti dona subsidii ferens,  
 Dictoque caram ventre pando testulam  
 (Quâ more prisco condier numi solent)  
 Hilarique mente, & imperante nemine,  
 Dextrâ haud tenaci frangat ad patris pedes,  
 Atque hosce gratos in super iungat sonos:  
 En quidquid olim parca servauit manus,  
 Scrinive claustro, aut arcule arcane angulo,  
 Nunc hacce testâ hoc omne collectum probè  
 Nihil morata confero oblatum tibi,  
 Fruendum, habendum, & possidendum liberè.  
 Solare te non censu, at affectu tuæ:  
 Si plura haberem, siue quæis diues Tagus,  
 Pactolus aut arenulis ditat mare,  
 Opesve quas formica seruat Indica;  
 Quodcumque id esset, seu preti quantilibet,  
 Id omne, genitor, protinus sinum ad tuum  
 Cum corde toto funderem gaudens libens:  
 Sed grata nunc sint paucula hæc saltem precor,  
 Nonne adferens, pusilla quamuis, hæc patri  
 Mereatur ipsa, gnesia ut soboles tua,  
 Post dulcis oris fixa casta basia,  
 Amore amor reddito, heres scribier,  
 Tuæque mentis omnem habere paginam?  
 At longè amantis laxior manus est DEI,  
 Quin sponte & hosce nil petentes hîc sibi

Locupletiore diuitat censu Optimus;  
 Dignósque censens regijs poli bonis,  
 Non dona rerum, primus ipse quæ dedit,  
 Sed senſa cordis censum amoris æstimans,  
 Quæque ipsa per se sunt nimis minutula,  
 Dum velle spectat, pensitans magni fatis,  
 Ex asse totâ scribit heredes sibi.

Hæc liberorum, vt carior quædam Deo  
 Secreta turba, carcerem hunc sacrum incolit.  
 Quin ergo & iste hîc aureis clathris nitens,  
 (Non ille captos, sponte at inclusos suâ  
 Sacris volones alligans ergastulis)  
 Ignotus antè, fortè & inuisus tibi  
 Descriptus vt sit pauculis, faxo, notis.  
 Si non recusas, iâmque respondes mihi;  
 Spectare fas sit, si potiri non datur;  
 Amare liceat, si fruiſci non licet.

Faber ipse summus, filius dictus Fabri  
 Magni & minuti, consili sator boni, hæc  
 Qui vincla cudis legis haud, sed arbitri;  
 Adeſto, Chriſte, Maximi proles DEI,  
 Laudes ſacrati prædicemus CARCERIS,  
 (Dixere priſci CLAVSTRA seu COENOBIA:)  
 Carcer repositas mentibus profert opes,  
 Sanctósque cultus incolis ſui refert:  
 Palmas virorum, virginúmque lilia,  
 Rosâsque Martyrum, vt charisma Spiritus.  
 Non deſit iſthuic carceri altum gaudium,  
 Sanctiſque mixta commodis iucunditas.  
 Aquæ ſilentis nimbulus lambit genas,  
 Sulcóque lapſus irrigat cordis ſata.  
 Virtus nitelcit diſcolore germine,

Pingitque mentem gemmeis honoribus.  
 Gemitus fufurro murmurant grati leui,  
 Dum summa cæli, & hinc nouos rores petunt.  
 Mens rapta fufum coniuges artus leuat,  
 Sibique inumbrat terra quod celfi tenet:  
 Sperata profert horror antri vmbacula,  
 Prohibetque Mundi, & feruidæ carnis miſas.  
 Genij ſupernè cælicos miſcent modos,  
 Vilisſque curas cantibus pellunt ſuis.  
 Carter beatus allicit, paſcit, tenet:  
 Animæ gementi demit angores graues,  
 Menti vigorem reddit, & fufum rotat:  
 Refert labori inæſtimandam gratiam,  
 Tribuit colenti ſempiternum gaudiū.

Sed ſermo noſter terminum hîc figens ſibi,  
 Benè ominati ſiſtet in verbi gradu:  
 Modestia ne carcere excurrens procul,  
 Concinna fidæ clauſtra linguæ deferat.

Summâ negotiî in pauca verba vt contraham,  
 Ad te reflecto, carcerem, ô Groti, meæ  
 Curæ & laboris, circulumque indiſtriæ,  
 Non negligendum, ô, quale de triuiο, caput.  
 Hoc reſtat vnum, quando diſcuſſus, ſatis  
 Non peruiaci, deuia mentis vapor,  
 De lacte ſumptus, moris & fuligine;  
 (Venialis error dum grauem citra ſtetit  
 Culpam, improbi faſtusve pertinaciam:  
 Dum nec docenti, recta quæ tradit Fides,  
 Eccleſiæ petulcus impegit pedem:  
 Cauere iuſſis ſubdolis Sirenibus  
 Proteruiore adhæſit aut lubentiâ:  
 Poſiſſe Circes præuidens ſe proluit,

Spreto furoris ingruentis nuntio;  
 Suspende gressum: siste te, siste, ô, precor!  
 Ne per recline spontè libratus ruas.  
 Fouea ista præceps tartari ad centrum patet:  
 Pater lacuna hæc, quæ dedit tantos neci,  
 Neci, heu, tremendæ, horrendæ, inextinguibili.  
 Quin siste cursum, sustine, inclamo, & redi.  
 Iamq; haud moratus, HORAE & obseruâs TVAE,  
 (Quam vt ruere scisti, ne ruisse post gemas,  
 Hanc esse signo, quâ tibi ista ego occino,  
 Quæ per minuta & puncta verbi nunc fluit)  
 AUDI, atque, quò Dux cælitus datus tibi,  
 Et certus auctor dirigo, AVDETO sequi.  
 Quod ni! sed omen dissipet bonus Deus.  
 Qui vt antè largus, nunc tamen spectat polo,  
 Mentem atq; dextrâ nunc magè obseruat tuam,  
 Quando hanc & illam quò lubet tendas licet.  
 Armat preces vox Angeli, virtus Dei.  
 Quod Angeli & Custodis est, hoc nuntio,  
 (Vtrasque partes hæc hora vt tuear petit)  
 Quod est amantis, nil moratus arguo;  
 Satagentis est quod prouidus canto tibi.  
 Occasione tu haud supinus in bonâ  
 Redde hanc merenti pro tot officijs fidem.  
 Agnosce verum; quo solo est opus, peto:  
 Agnosce certum; quod iubet Deus, peto:  
 Agnosce amicum; quod tuam est in rem, peto.  
 Geminat precésque non satis fidens amor.  
 SECEDE TVRBA, QVAE NOVAT, quæ subdola est:  
 Ne te periculis inscium inuoluat suis.  
 Inuictam vt arcem carcerem veri occupa  
 Solidi, perennis, pristini, primi, sacri,  
 Magni,

Magni,

Magni, vetusti, immobilis, cælo dati.  
 Hic certum asylum, reddere hic tutū, integrum,  
 Securum ab hoste, solus & saluum potest.  
 Cur immerentem, ingratis, damnes, miser  
 Non destinatum compedi pedem nouo?  
 Ut quid Nouantum carceri atro te implices?  
 Quæ cæcat illos, caussa non subest tibi.

Inter Ministros principes sectæ nouæ  
 Noui, atque digito, certus, ostendam probè,  
 Quos aut lubido, mentis aut cæcæ furor,  
 Dolor, cupido, sacra quos auri fames,  
 Sitisve famæ, & appetitus gloriæ,  
 Quos impetigo scabra rixandi, impotens  
 Cacoëthes atque iurgij auersos tulit:  
 Quos ira, luxus, corque non patiens iugi,  
 Nec imperantis regulæ aut legis ferens:  
 Vorique rupti læua conscientia,  
 Pœnæque terror, pœnitentiæ aut timor:  
 Quos spes rapinæ diuitum impendens bonis,  
 (Qui inuniis & maximè adscripti sacris)  
 Priui nihil dum scrinia aut loculi tenent;  
 Cassæque mentis egit obliquos furor:  
 Solutior quos vita, ventri & inguini  
 Dicata, fabros dogmatis fecit noui:  
 Quos lucri odor, vitæ pudor, proteruia,  
 Quos inquieti pectoris vibex malus  
 (Nemesis flagello iusta dum surdo ingruit)  
 Quos impotentis spiritus superbiæ,  
 Tumidique carcer cordis inflatos tenens,  
 Et, verbo in vno, mens mala atque animus malus  
 Prærupta in ista nempe transuersos dedit.  
 Quid inter istos tu recens locum occupes?

Quin tu modestus, integer, voti boni,  
 Rectæque mentis, frugique, recti appetens,  
 Oforque pravi nominis, moris, iugi,  
 Sociare priscis, candidis, firmis, bonis.  
 Quod imperare ius mihi atque fas, rogo.  
 Rogatque amicus, scripta cuius hæc manu,  
 Exalciati appensa trutinam ad ingeni  
 Sint inficeta gratiis licet tuis.  
 Stylum ille sumpsit, me monente, concitus  
 Amore HUGONIS, non amore GROTII.  
 Te CHRISTVS, ego te, teque amicus obsecrat,  
 Monetque fidus: hoc vouens tibi ac sibi,  
 (Quando hoc in vno tanta ludit alea,  
 Per secula seculi ut optimè aut sit pessimè)  
 Quandoque socio ut perfruatur Grotio,  
 Cum fas erit satiarier vultu Dei.  
 Redde hanc monenti plenior gratiam,  
 Groti, pares tibi omniforme ut gaudium,  
 Tunc carcer ipse mirus ut, capax Dei.  
 Sed iam tu, onuste dotibus multis, mea  
 Quæ cura struxit, largiente Numine,  
 Caue, otiosa siue inania hæc putes.  
 Neu dicta (spissioris quæ fili adfero,  
 Haud scripta casu at destinato examine,  
 Nec prunientum pabulo breui aurium  
 Concinna promens) obuio auertas pede,  
 Siue aure laxâ & perfluente transeas,  
 Quæ larga amici cura pro captu dedit:  
 Putesque inani hîc pascier mentem sono;  
 Protestor ipse parte me functum meâ.  
 Tuæ salutis, muneris nostri memor  
 Monui, rogavi, quod tuam est in rem attuli.

Quæ

Quæ plura possim, quando cogere est nefas?  
 Cohortor, in isto, interminor, iubeo, obsecro:  
 Tu cura, inanis ne sit hic labor tibi,  
 Cassusque amico, euanidus ne sit mihi.  
 Nec otiosè (cùm sit otii copia,  
 Me dimouente quidquid obstaculi fuit,  
 Parata, fracto carcerum nexu omnium)  
 Transi, quo in vno finis est situs tui,  
 Quo rerum in vno vertitur cardo, & salus.

Fauc ô, cui omnis lectioris seu luti,  
 Seu vilioris massa dextræ in carcere est:  
 Qui prompta cerni, quæque visu imperuia  
 Non carceratus carcere includis tuo;  
 Lutum tibi hocce in vas honoris asserere,  
 Finge, & re finge, tempera, excoque, ex politis  
 Tibi, Grotio vt vas gratius nullum fiet.  
 Luteum per istud, figule, vas te deprecor,  
 (Vas cuius infinitus exsurgit valor,  
 Vas sordet ad quod tota mundi machina)  
 Quo, carcere vt, te passus es circumdari,  
 Acui ô locique interminande terminis,  
 Amore cocto, purpurato sanguine,  
 Candore puro, & emicante lumine,  
 De virginali testulâ assumptum tibi,  
 Quod cælo & astris clarius, perendie  
 Reparandum amoris hæcce confregit dies.

Nam luce eâdem hac, omen vt notem sacrum;  
 (Sedena at antè deuoluta sæcula  
 Quaterna lustra & anni circulum vnus)  
 Trieterides post vndecim cursus tui,  
 Occasum amarum es passus auctor luminis,  
 (Phœbo obtegente vultum ad hoc spectaculi)

Pacis serenum vt funderes iubar piis.  
 Quâ luce Iani nunc recluso carcere,  
 Fractoque portæ cardine & repagulis  
 Mars dirus, armis Belgium accendens suis,  
 Ferro recuso cœpit inolescere:  
 Bis seni & anni vincta corda fœdere  
 Diuulfit amens, in gemella viscera  
 Mucrone stricto abominata matribus  
 Internecive bella vindictæ ferens:  
 Heu, iunge dextras, parcito ô, tanto hoc die.  
 Iam, Christe, fusi sanguinis nostri satur,  
 Iam, Christe, fusi sanguinis memor tui.

Patriæ sibi que & posteris pacem petens,  
 Deique honori largius factum volens  
 Vouebat, & pangebatur hæc Grotio:  
 Non dicis ergo, fonte at imo è pectoris,  
 Popularis illi, amicus, & magni æstimans:  
 Speransque vinclo sanctiore stringier,  
 Et sacro ouili, vt carcere vno, hic claudier,  
 Quò celsa cæli templa post iunctos beent,  
 Ortum Hagienfis, incolatu Antuerpius,  
 Tholum ad sacratum VIRGINI MATRI DEI  
 CHRISTO dicatus Gratianus Cælius.

LAVS DEO, VIRGINIQUE MATRI.

EIVS-



EIVSDEM HEMELARII  
 A D  
 EVMD. GROTIVM  
 EPIGRAMMA  
 SVPER SCITO EIVS SCITO  
 RVIT HORA.

**H**ORA RVIT, scisti. Bellè hoc, vt cetera;  
 nempe hinc

Vitæ vt præcipitis fim memor, inde brevis.  
 Num quid plus latet hoc curti sub cortice dicti?  
 Vt credam, ingenij vis monet alta tui.

Fors meminisse doces: multos quia mobilis hora  
 Præcipitat, ne nos HORA sinistra RVAT.

Quin præfaga magis mihi mēs tua visa fuisse est,  
 Sera vides multos quod Metancea premat:

Hoc canis ergo; HORAM visam tibi sæpè RVISSE  
 Multis, & multos: ne mihi, meque ruat.

Verùm eadem hæc tibi reddit amor: Dum gratia  
 Christi

Oblata est, multis hora beata ruit.  
 Ingrati ergo hodie facinus, GROTI, ipse caueto,  
 Ne neglecta tibi hæc gratia teque ruat.

## A L I V D.

HODIE, CRAS SERVM.

**H**<sup>O</sup>R A R V I T, Groti, præceptisque occasio-  
cursum

Cras serum erranti flectere, flecte hodie:

Quod superest vitæ, quia spes incerta futuri,

Cras serum Domino viuere, viue hodie:

Quæ modò facta tibi velles, neglecta doleres,

Quò tibi certa salus constet, agas hodie.



BONA VITA

DVM DIFFERTVR

PERIT.

IN

EIVSDEM EPIGRAMMATA  
I N  
ARCAM LIGNEAM  
HVGONIS GROTII  
ASSERTRICEM.

**D**VRATEI memoratur equi texisse sub aluo  
Graiu genas, fraudum in Troas fabricator  
Epeüs.

Machina at hæc quâuis proceres celasse feratur,  
Clarius illa tamen mihi nobiliórque videtur  
Venturis celebranda viris, quæ audace reperto  
ARCA virum texit, quæ GROTI condidit artus  
Spirantis, dominum quæ tristibus extulit antris,  
Custodesque manus, custodum innixa lacertis,  
Secreti & magni custodia certa fefellit.

Qui dubitat, mecû capsam componat vtramque.  
Attulit illa dolos infida, hæc fida salutem.

Illa hostes inuexit, at hæc euexit amicum.

Matribus Iliacis pestis fuit illa virisque,  
Hæc domino, vxori, & gnatis tutela salusque.

Illa dedit ferro ac flammâ grassante ruinam  
Imperio atque vrbi, Priami bustumque reliquis  
Securis habitare lupis catulisque ferarum:

Hæc, ne mens traheret Groti corpusve ruinam,  
Ingeniumque viri obscuro marcesceret antro,

Et miserè infami latitaret in arce sepultum,  
Tum (quod erit, simul vt radij strictura superni

Aceedet, quem sollicitant pia vota bonorum)

Ne

Ne secli sorderet Honor, dignissimus annis,  
 Ne tantò ante diem dextrâ demessus iniquâ  
 Hosti ludibrium, luctum deberet amicis,  
 Subsidium vna fuit, sacra anchora, & ara salutis.  
 Quin etiam noua si liceat conferre vetustis,  
 Heròas olim quæ prima per æquora vexit,  
 Cuius Fama locum cælestibus addidit astris,  
 Non mihi nobilior posthac mèmorabitur Argo:  
 Non quæ prima ratis cursu complectier orbem,  
 Magellane tibi intrepido noua dum fretu pandit,  
 Ausa fuit, cui condignum Victòria nomen  
 Et dedit, & memores iussit celebrare nepotes.  
 Vna mihi ante alias semper, monumenta So-  
 phorum

Quæ tam sæpè tulit, quæ docti arcana magistri  
 Haud seruate rudis pridem, pòst condidit ipsum,  
 (Tunc etiam, in magno sed pectore, bibliotheca)  
 Incolumem & certis euexit fida periclis,  
 Depositi magni cultos celebrabitur ARCA.

## ALIVD IN EAMDEM.

QVÆ genus humanum, & mortalia secla  
 animantium  
 Semine in exiguo fàtalibus extulit vndis  
 (Cùm Themis atq; atrox ter-magni Numinis ira  
 Omne tuum, Proteû, pecus altos visere montes  
 Compulit, & pauidas natirare per equora damas)  
 Arca fuit, mundi instar habens, dum cetera victor  
 Neptunus vasto sepeliret gurgite ponti.  
 Quæ modo *Grotiaden* miserandi carceris antro  
 Eductum in dias prouexit luminis oras,

Arcta

Arcta licet, fuit **A R C A** capax, nec pondere magno  
 Succubuit, veluti sub iniquo fasce viator,  
 Ingemuitve premi. clari quin sæpè labores.  
 Ingenij, Doctorum & opes perferre fidelis,  
 Et domino cultas portare assueta tabellas;  
 Illius extremum mox ad selecta laborem  
 (Si ligno quis sensus inest) concepit amorem  
 Prædulcis famæ, & celebranda volare petiuit  
 Docta per ora virum, monstrari, & dici, *Hæc est.*  
 Promptior ergo ipsum, quàm, vt pridem, ferre  
 libellos,  
 Dum textit non pressit herum, non panda, cre-  
 pante  
 Prodidit, ast fidas hilarem traduxit in oras,  
 Optataque diu mox libertate beavit.  
 Dignam itaq; ad seros nomen transferre nepotes.  
 Versibus æternis clari celebrate Poëtæ.

## A L I V D.

**P**ELLAEI iuuenis (cui vasti ob cordis hiatum  
 Immensamque sitim laudis, sceptri atque  
 triumpho,  
 Ex populi palpo **MAGNI** cognomen adhæsit)  
 Dum nimis angusto queritur de limite mundi,  
 Terra haud visa capax fuit: ast (Babylone sepulcrum  
 Sex septemve pedum tenuis dum continet arca)  
 Carceris ipse atri tenebris adscriptus in ævum  
 Parte sui, atque alia manes detrusus ad imos,  
 Iamque suis oculis vilis, nimiumque pusillus  
 Vota hominum quantilla sient, quàm vana fatetur.  
*Hugeni* (quem stirps, gentilis linguaq; **MAGNI**  
 Signa-

Signauit titulo, nec tanti nominis omen  
 Permisit vacuum) postquam illum carceris antro  
 Infami hostilis sepelisset factio turbæ,  
 Quattuor **A R C A** pedum vitam, famam, atque  
 salutem

Reddidit incluso (fuit huius pronida consors  
 Femina dux facti) quem pridem & perdere liuor  
 Gestierat, frustra patriæ dum iura vocantem  
 Claustrorum tenebris damnauerat atque catenis,  
 Vexatum in tristi diris custodibus arce;  
 Maiorem ipsa sibi latisque remisit amicis.

Magnū illum in viuis detexerat arca pusillum:  
 Damnatum hunc, capitis ciuili & morte minutum  
 Complexa Arca breuis tum libertate beaurit,  
 Tum Famæ immensis sublimem sustulit alis.  
 Arcam igitur si quis rectè librārit vtramque;  
 Quantum surgenti concedit subruta famæ,  
 Quantum sol oriens potior fugientibus astris,  
 Vita redux morte est, & cæco carcere cælum:  
 Et quantum tenebris præstant noua lumina, dicet  
*Grotiada* tantum *Pellæi* cedere & Arcam.



CEN.

## C E N S U R A.

**A**NGELICVM hoc Paraneticum Reuerendi Domini Ioannis Hemelarij Canonici Cath. Eccl. Antuerpiensis super Hugonis Grotij carcere, spirans doctrinam & charitatem veram, nullatenus carceri includi, sed ad omnium manus diffundi dilatariq; dignum: quare publico bono in lucem edi poterit. Datum Antuerpie, hac XXVII. Maij, Anno salutis M. DC. XXI.

Zegerus van Hontsum, Canon.  
& Pœnitent. Antuerpiensis,  
nec non librorum Censor.

S Y M

## SVMMA PRIVILEGII.

**A**LBERTI & ISABELLAE CLARAE  
EUGENIAE, Archiducum Austriae, Du-  
cum Burgundiae, Brabantiae, &c. Serenissimorum  
Belgicae Principum Privilegio cautum est, ne-  
quis, *Angeli Custodis ad Hugonem Grotium*  
*Paraneticon, exceptum & publicatum à Ioanne*  
*Hemelario Hagienfi, Canonico Ecclesia Cathe-*  
*dralis Antuerpiensis*, præter Balthasaris Moreti  
Typographi Antuerpiensis voluntatem intra  
sexennium imprimat, aut alibi impressum in  
has Inferioris Germaniae ditiones importet,  
venaléve habeat. Qui secus faxit, confiscatio-  
ne librorum, & aliâ graui poenâ mulctabitur, vti  
latius patet in litteris datis Bruxellæ, XVII. Iu-  
nij, M. DC. XXI.


Signat


Steenhuyse.




ANTVERPIAE,  
EX OFFICINA PLANTINIANA  
BALTHASARIS MORETI.  
M. DC. XXI.













21.

